

城隍廟（唐健垣唱）

【南音短板面】

來到廣州城外城隍廟就觀看吓，甚喧嘩。
廟前個啲攤檔，擺到密麻麻。
咦！門前有一對石獅子，真係殊高雅，
聽講係明朝嘅古物，實堪誇。
圍牆畫滿牛頭馬面，得人怕，
徧徧佢又紅牆綠瓦，係好似一座官衙。
廟前嘅空地，就係大笪地，咁就供人响處樂耍，
嘩！呢度有人响處測字，舌祭蓮花。
有一個盲公，檔口寫住盲仔祥，同人睇相兼占卦，（白：唔知點睇呢，盲嚟嗎！）
佢話三世書，有好多本，乜都有得查。（白：盲點查呀？你查呀嗎！）
哦，有人大嗌，（白：發財埋便！）叫人埋去睇吓，
佢話公平開賭，有假冇花。
阿藥哥，（白：唔知係咪姓何個位呢？）將番攤，咁就來擺下，佢又話無欺詐，
但見荷官，阿九少，就密密把錢扒。【腔】

【南音短序】

咁我又慢唱，呢一班賭徒，佢哋如何响處樂耍，
等我行埋去個一便，咦，點解咁喧嘩。
【中板】哦，原來係賣武，將鼓打，
佢哋拳來腳往，又玩棍與耙。
又話武當、又話少林，未知真定假，
佢話藥油可醫跌打，梗係誇啦啦。
仲話鬼腳七、同黃飛鴻，都唔夠佢打，（白：係唔係呀？）
佢哋又話至善禪師，共獨臂神尼，就係佢阿媽及阿爸。
（白：喂，係咪偷情呢可？唔係，生咗我哋先出家嚟。唏！唔好嘈啦。）
隔離檔口就有個豆皮光頭佬，把招牌掛，
【慢板】寫住西洋鏝水，脫墨係包你無疤（音啦）。
各位光頭，或者脫髮，咁你無用怕，
只要將啲豉油，搵鏝水啦，口服係兼外搽。（白：有冇效嚟？有呀有呀！）
【中板】牆角有個道人，响處將幻術耍，
將隻拖鞋嚟到蓋（音衮上上聲）住，佢話轉眼就變龍蝦。
又話青蛙，隨時可變成蛤蚧，
兩文錢，睇一套，包你笑哈哈（音卡下平聲）。

（白：喂喂喂，咪住。

...

...